

Лулчеберет

Ижлэн марзәнэз

10 ар ортчыса, Йоскалык библиотека нош ик өсьёссэ вольяз

Кылем арняе Ижын сий-дано усьтйськиз выльдэм Национальной библиотека. Сое тупатъянлы 630 миллион манетлэсь трос коньдон кошкыз. 10 ар витёно луиз.

Кырзаны

Ижысь Йоскалык библиотекалэн юртэз, куашкан калэ вуэменыз, 10 ар чоже ворсаськыса улйз. Та дыр чоже «Ленинка» пыртосын кадь пöртэм юртёсын ужаз. Бадзым лэсьтйськон мытэмын вал 2019-тй арын. Кылем арняе быдэсак выльдэм Национальной библиотека өсьёссэ усьтйз. 3 нунал чоже 2 сюрслэсь ятыр адямиос адзизы, дунъязы выль лыдзйськонниез.

Туала библиотекаез вуженыз уд чошаты. Выж, вöлдэт, борддорёс — музейын кадь, соосты учкем но учкем потэ. Библиотека 1,5 миллион книгалы корка луоз. Кызы шуэ Йоскалык библиотекалэн кивалтйсьез Татьяна Тензина, та — «книгаослэн дворецсы», Ижлэн марзәнэз. Азвылэныз чошатыса, выльдэм юртлэн быдзалаез 2 поллы йылйз. Валтйсь юртлэн мышказ эшшо 6 этажем юрт жутэмын. 4-тй этажаз утиськозы книгаос. Со сяна, библиотекаын кылдйзы чылкак выль интыос но: 123 адямины чаклам конференц-зал, литературной кафе, нылпи висьет, галерея, арт-центр но куарая студия. Куарая студия вань туала куронёслы тупа. Татын луоз роликёс, кырзәнёс гожъяны, аудиокнигаос дасяны. Нош арт-центрын — искусстволы сйзем ужрадёс ортчытыяны. Чапак та вакытэ «100 юан Чайковский сярись» адзытон ужа. Татын ик луэ дано крезгурчимылэсь произведениоссэ но кылзыны.

Быдэс толэзь чоже библиотекаын коркатуйлы сйзем экскурсиос, тодмо писательёсын пумиськонёс, литературной жытёс,



Лыдзйськон дуннее нуись тубат.

концертёс, визь сынәнёс, котырес жöккёс ортчылозы.

Татьяна Тензина верамъя, библиотекае 75 миллион манет тыр ужан тйрлык вуыны кулэ. 30 миллион манет тыр тйрлык вутэмын-интыямын ини, кылемез библиотекае вуоз ар кuspын.

— Шаертондоя зал, азвылэныз чошатыса, бадзымаз, со азыло интыяз ик — 1-тй этажын, бур палаз. Электрон изданиосын ужаны туннэ ик луэ ни. Нош книгаосты кутыса лыдземзы потйз ке, возьмано луоз. Вань книгаос татчы өз берытске на, черодзэс витё. Выльдэм библиотекаын 4 бадзым лыдзйськон зал. Соин ик огаз инты ке өз тырмы, лыдзйсь пуксыны быгатоз мукет залэ. Азыло кагазёсын каталог шкафёс сыло вал, выльдэм библиотекаын озыы ик, карточкаосын но, электрон каталог но луоз. Со сяна, татысь шедьтыны луоз Удмуртиысь вань библиотекаослэсь но Россиысь Национальной лыдзйськоннилэсь огазеям каталогёссэс, — шуиз Татьяна Владимировна.

Библиотекае адямиос зэмзэ но экскурсие ветло, выль юртэз адзыны гинэ уг,

татын ужа Удмуртиысь 28 суредасёслэн «Арлэн вакытёсыз» адзытонзы. Суредёсты аслаз галереясытыз татчы интыяз усточи Рустам Булатов.

Шудыны

Национальной библиотекаын табере вань покчиослы чаклам туж шулдыр но яркыт зал. Татын книгаослэсь тросгес шудонёс. Кылсъярысь, лыктйз егит анай библиотекае диплом ужзэ гожъяны, тэшкылизэ 1-2 часлы кельтйз шудыны. «Библиомама» площадкэлэсь пайдалыко луэмзэ тодэ сукур но ляб адзйсьёслэсь лыдзйськонзэс радъянъя улосвыл центрын ужась, реабилитация ёзэн кивалтйсь Ирина Шутова:

— Пинальёсын лыдзйськозы, шудозы. Нимысьтыз занятиос ортчытыялозы инвалид нылпиосын, ляб адзйсь-кылйсь тэшкылыосын ужаны дышетскем адямиос. Тани мон, кылсъярысь, дефектолог, ми дышетйськом сукур нылпиосты Брайльэн шрифтеныз лыдзйськыны. Та площадкын ик луоз канистерапия. Инвалид нылпиослы юнманы юрттоз нимысьтыз



Библиотекаын пöртэм ужрадёс ортчыло ини.

дышетэм Ида пуны. ДЦП-ен, аутизмен висись пинальёс, ляб адзйсь нылпиос, Идаен шудыса, вераськыны, калыкен кусып тупатыны дышетскозы, — шуэ Ирина Вячеславовна.

Нылпи висьетын телевизор пыр выжыкыльёсыз возматозы. Со Национальной библиотекалэн но Россиысь Культура фондлэн валче проектсы. Соя Россиысь пöртэм выжыысь калыкёслэсь выжыкыльёссэс тодмо артистёс лыдзозы. Библиотекаез усьтон ужрадын пичиосты тодматйзы удмурт калык сям-йылолёсын, Лöпшо Педунен но «Азвесь манет» шудонэн.

Пумиськылыны

Выльдэм библиотекаын пöртэм мастер-классёс ортчылозы, клубёс ужалозы. Кылсъярысь, удмурт кылья «Кубо» клуб люкасыкылйз ни. Ижысь коллекционерёс но асьсэлэсь клубзэс кылдытызы ни.

Эшшо одйг выль площадка — коворкинг-центр. Татын оген яке көня ке кузя ужаны, пумиськылыны, кенешонёс радъяны луоно. Нырысетй пумиськонзэ орчытйз социопсихолог

Елена Леванова. Вераськон бергаз «Туала нылкышно — литератураын но улонь» тема котырын.

Литературалы сйзем кунокуаын шунит пумиськонёс ортчизы ини. Кылсъярысь, «Удмуртия» издательствоын ужасьёсын — книгапоттонилэн кивалтйсеныз Юрий Кузнецовен, валтйсь редакторен Георгий Грязевен, чеберлыко литература редакторен Сергей Матвеевен. Воргонёс веразы, көня кужым понэмын котькуд книгаез лыдзйсь доры вуттон понна.

Зэмос кузым лэсьтйз удмурт кырзәнэз яратйсьёслы Удмуртиысь калык артистка Надежда Уткина. Татын солэн «Вань мынам выжыкыл дуннее» вакчияк концертэз ортчиз. Вакчи шум ке но, пуштросэзъя но шунит мылкыдызъя зэмос юбилей жыт кадь вал. Надежда Уткина удмурт но фин-угор кылбурчиослэн кыльёсыя гожтэм кырзәнёссэ быдэстйз. Татьяна Тензина тау карыса Надежда Уткиналы «Национальной библиотекалэн дано лыдзйсьсэ» пус кузьмаз.

Галина СЕМЁНОВА



Удмурт Республикалэн Төрөез Александр Бречалов:

— Ваньмыз пöрмиз чакламлэсь но зечгес. Табере библиотекаын туала амалёсты уже кутыны луэ. Татын кужмо коллектив тырше. Мон оскисько, соос быгатозы лыдзйсьёсты но доразы кыскыны, республикалэсь лулчеберетсэ но азинтыны-узырмытыны.



Йоскалык библиотекалэн кивалтйсьезлэн воштйсьез Анна Семёнова:

— Милям луонлыкёсмь табере бадзымесь: егитёсын выль сямен ужалом, эшшо но тросгес тунсыко пумиськонёс ортчытыялом. Шумпотйсько, книгаосын узырмыськомы шуыса, туэ гинэ 6 сюрс пала издание вуиз. Тау карыны кулэ библиотекалэн коллективезлы. 10 ар чоже соос 5-6 юртёсын ужазы, куддыръя муржол кадь интыын но. Но нокин но мылкыдзэ өз куашкаты.